

# Jangan gagalkan usaha murni kerajaan

Secara umum kita semua maklum mengenai apa yang dilaksanakan kerajaan dengan memberi Kad Diskaun Siswa IMalaysia (KADS1M) kepada pelajar. Kini, graduan dalam institusi pengajian tinggi sekitar 1.3 juta iaitu satu jumlah yang terlalu besar.

Kerajaan melaksanakan tugas dan tanggungjawab dengan sebaik mungkin walaupun dalam keadaan ekonomi tidak menentu untuk meringankan beban golongan pelajar. Harapan kerajaan dengan ada kad seumpama itu, dapat mengurangkan beban dihadapi mahasiswa dalam pelbagai aspek sama ada pembelian barang yang berkaitan dengan pembelajaran atau hal berkaitan makanan.

Kerajaan sudah melaksanakan

usaha ini dengan sebaik mungkin, menyediakan skim atau peruntukan di bawah KADS1M. Seperti apa yang dibangkitkan BH, apabila pelajar menggunakan kad diskaun itu di premis tersenarai atau yang ada perjanjian dengan kerajaan, ada yang kecewa kerana ada yang diterima dan sebaliknya.

## Harap sokongan agensi

Di sinilah kita mengharapkan peranan dan sokongan agensi di luar sana supaya terus membantu pihak kerajaan dalam memastikan agenda membantu mahasiswa ini tercapai.

Pihak kerajaan boleh melaksanakan apa yang patut dilaksanakan tetapi pada masa sama, untuk menentukan kejayaan sesuatu program dan inisiatif, memerlukan sokongan padu se-

mua pihak dan dalam konteks ini, syarikat yang sudah membuat perjanjian menerusi program berkenaan.

Tanpa sokongan padu daripada pihak terbabit, tentunya apa yang dilaksanakan kerajaan tidak akan dapat mencapai matlamat seperti mana yang dirancang. Begitu juga dalam isu KADS1M. Kita mengharapkan masyarakat memainkan peranan, tidak boleh mengharapkan kerajaan semata-mata dalam melaksanakan agenda mulia ini.

Kerjasama dan komitmen masyarakat termasuk graduan atau mahasiswa perlu ada dengan memberi maklum kepada kerajaan dan agensi, jika mana-mana pihak yang tidak mahu memberikan kerjasama untuk merealisasi agenda KADS1M kerana kita

sedar pada peringkat awal, mereka sudah memberi lampu hijau kepada kerajaan untuk terbabit dalam program yang mulia ini.

## Bantu kerajaan

Tetapi ada di antara mereka yang melaksanakan tugas atau tanggungjawab seolah-olah melepas batok di tangga. Kita mengharapkan komitmen masyarakat, mahasiswa dan agensi terbabit untuk membantu kerajaan merealisasi inisiatif luar biasa yang dilaksanakan, saya kira di dunia.

Kita perlu bersyukur dengan inisiatif ini dan berharap serta memastikan ia dapat dilaksanakan dengan maksimum. Pihak yang terbabit perlu bekerjasama dengan kerajaan untuk memastikan agenda ini tercapai dengan jayanya.

## Komentar



**Prof Datuk Dr Mohammad Shatar Sabran**

**Timbalan Naib Canselor (HEP & Alumni), Universiti Putra Malaysia**